


TXIRRINDULARITZA



Pello Ruiz Cabestany. C.VILLAGRAN

Cabestanyk Gatorade taldean korrituko du hurrengo urtean

P.A. / DONOSTIA

Pello Ruiz Cabestanyk Italiako Gatorade taldean korrituko du hurrengo hiru denboraldietan, atzo bertan kontratua sinatu ondoren. Oraindik baieztatu ez den arren, txirrindulari donostiarrak 35 milioi pezeta inguru irabaziko ditu urte bakoitzeko. Cabestanyk Clas-Cajastur taldean korritu du aurtengo denboraldian, Juan Fernandez aginduetara baina asturiarrek ez zioten kontratua berritzeko eskaintzarik egin.

Hasiera batean, Seul eta Seguros Amaya izan ziren Cabestany fitxatzeko interesa agertu zutenak, baina azkenean gauzak ez ziren konpondu. Seurrek ez zituen Pellok ezarritako baldintzak onartu eta beraz, negoziaketak apurtu egin ziren. Seguros Amayari dagokionez, Cabestanyk talde indartsu batekin fitxatu nahi zuen eta Amayaren eskaintzari ezezkoa eman zion.

Horren ondoren, Italiako bi taldek Donostiako txirrindularia kontratazeko desioa zutela jakin ahal izan zen. Carrera eta Gatorade ziren Cabestany fitxatzeko ahaleginetan ari ziren bi taldeak. Italiatik heldutako zurrumurruen arabera, Carrera zen aukerarik handiena zuena, baina azkenean negoziaketak bertan behera uztea erabaki zuten, Stephen Roche irlandarra fitxatzeko. Gatorade eta Cabestanyk duela aste batzuk hasi zituzten negoziaketak eta atzo bertan lortu zuten akordioa. Gianni Bugnoren taldea tropeleko talderik indartsuenetakoa izango da hurrengo denboraldian, Laurent Fignon, Dirk De Wolf, Abelardo Rondon eta Pello Ruiz Cabestany fitxatu ondoren.

SEI EUSKAL TXIRRINDULARI CHCS TALDERA

Sei euskal txirrindularik gaur sinatuko dute kontratua Caja Hipotecaria Centro Sur (CHCS) taldearekin. Talde profesional berrian korrituko duten txirrindulari hauek Enrique Alonso, Xabier Carbayed, Jose Antonio Martiarena, Jokin Mujika, Iñaki Murua eta Abraham Olano dira. Enrique Alonso Lotus taldetik dator, Jokin Mujika Banestotik eta Carbayed, Martiarena eta Murua Paternina talde desagertutik. Abraham Olanori dagokionez, hurrengo izango da bere lehen denboraldia, aurtan AVSA talde bizkaitarrean korritu ondoren.

PILOTA

Juan Ramon Rementeria 'Remen-ek' munduko txapelketa eskuratu zuen, Julian Kalzakorta Elortza markinarrekin batera. Bermeon jaiotako 'amerikar' honek merezimendu osoz lortu zuen urrezko domina mundial bikaina

jokatu ondoren. Remenek omenaldia jasoko du gaur Bermeon, astelehenean Hartfordarako bidea hartu aurretik. Itsoaz bestaldean urte asko egin ondoren Euskal Herrira etortzea gura du bermeotarrak honek.

Remen: «Ezin gogorragoa izan zen hiru urtean jokatu barik egotea»

RAMON BASALDUA / BILBO

EGUNKARIA.— Lehenengo eta behin, bermeotarra ala gernikarra?

REMEN.— Ni Bermeon jaio nintzen eta hamar urtera arte Juan de Nardiz kalean bizi izan nintzen. Hamar urte t'erdirekin Gernikara joan nintzen, eta hamazazpi urtegaz joan nintzen Ameriketara.

EGUNKARIA.— Ameriketan urte asko egin ondoren Euskal Herrira itzuli zara eta Munduko txapelketa irabazi duzu.


REMEN.— Ez da bat ere erraza izan. Ni Hartforden jokatzen nengoen eta emaitza bikainak lortuz gainera. Munduko Zesta Txapelketa hasi baino egun gutxi batzuk lehenago federazioko arduradunen deia jaso nuen. Eskaintako baldintzak gustokoak nituen eta Euskal Herrira etorri nintzen. Gauza bat kinielak jokatzea da, baina guztiz desberdina da ordu-bete t'erdia jarraian jokatzea. Dena den Elorza eta biok oso ondo kopondu ginen eta urrezko domina eskuratu dugu.

EGUNKARIA.— Elorzak sekulako partidua jokatu zuen finalean ezta?

REMEN.— Julian bikain aritu zen Mendi eta Elorduren kontra jokatu genuen finalean. Oso seguru jokatu zuen eta onena izan zen. Finalerdian arazo batzuk izan zituen, Gernikako frontoian ezin bait da eskumaz jokatu, kontrarioari abantaila handia ematen diozu eta. Gernikako Jai Alai oso frontoi luzea da eta pilotak atzera bota behar dira. Dena den, finalean bikain konpondu ginen eta partidua aurrera atera genuen.

EGUNKARIA.— Nortzuk izan dira zure arerio nagusiak?

REMEN.— Mundial honetan parte hartu duten pilotari guztiak onak izan dira, baina niri asko gustatu zait Katin Uriarterekin batera jokatu izan duen Retolaza. Beragaz batera, Felixek eta Elorduik ere sekulako mundiala jokatu zuten. Gernikako frontoian bildu izan diren zaletuek, par-



Remenen iritziz Estatu Batuetan kontuak ez dira lehen bezala izango. BASALDUA

tidu onak ikusteko aukera izan dute.

EGUNKARIA.— Zelan ikusi duzu zeure burua hiru urte jokatu barik pasa ondoren?

REMEN.— Hiru urte frontoi bat zapaldu barik egotea oso gogorra izan zen. Ni neu burdin-ola baten lanean aritu izan nintzen eta hasieran orduko sei dolar irabazten nituen. Legezko zortzi lan orduak bete ondoren, frontoi aurrera joaten nintzen beste pilotariekin batera. Eskiolak autobus barruan etzanda agertzen ziren, geuk ez ikusteko. Azkenean, urte honetako apirilaren 14an akordioa lortu eta greba amaitu zen. Dena den, ez

dut uste gauzak lehengo moduan izango direnik.

EGUNKARIA.— Gernikako frontoia bete beterik egon zen mundialeko partiduetan. Horrek zeozter esan gura du?


REMEN.— Giro ikaragarria egon da bai mundialean jokatu ditudan partiduetan, eta berotasun horrekin gustora jokatzen da. Badirudi jendeak zesta partidua ikusteko gogo duela eta gure betebeharra partidua onak eskaintzea da. Zesta altxatzeko guztiok zeozter ipini behar dugu, gu ga ren guztia zestari zor bait dugu.

Pilotan irakatsi

Juan Ramon Rementeria 'Remen-ek' pilota biziki sentitzen du. Atzo bertan Bermeoko Artza frontoira sartu zenean, hauek izan ziren berak esandako hitzak. «Hau da hau frontoia. Frontoi hau ezin hobea da gazteei zestari irakasteko. Hemen eskola bat ipiniz gero, urte gutxi barru pilotari profesionalak sortuko lirateke. Ezinbestekoa da bestalde, irakasleak lan egiteko gogo handia edukitzea. Bestela soldata kobratzera besterik ez badoa, ez dago ezer egiterik». Remenek urte asko egin izan ditu Estatu Batuetako frontoietan eta nekatuta dago. Euskal Herrira etorri eta gustora sentitu izan da. Bere ustez, krisi handia dago zesta munduan, bai Ameriketan eta hemen bertan ere bai, eta irtenbide egokia zesta eskolak lirateke. «Estatu Batuetan izan den greban, pilotak asko sufritu izan du. Gazteek galdu duten ilusioa berreskuratzeko erarik egokiena zesta eskolak martxan ipintzea da. Niri asko gustatzen zait gazteei irakastea eta lan sendoa betez gero, zestak gora egingo lukeela uste dut».



Remen Bermeon. RAMON BASALDUA



Remen bere masaiariarekin. BASALDUA

Munduko Kopa eskuratu zuen 1978an Txurrukarekin batera

R.B. / BILBO

Juan Ramon Rementeriak Miami-rako bidea hartu zuen, hamazazpi urte bakarrik zituenean. «Miami-ra joatea zen zestalari gazte guztion amets nagusia, eta nik ere bertan jokatzea gura nuen», esan zion Remenek EGUNKARIARI. Bederatzi urte luze bete zituen Bermeoko aurrelariak Miami frontoian, 1981. urtean Connecticut estatuko Hartfordeko frontoira pasatzeko.

Pilotazale askok ez zuten Remen ezagutzen, Gernikan jokatutako mundialean parte hartu arte. Baina Juan Ramon Rementeriak, Iparraldean jokatu zen Munduko Kopa irabazi zuen 1978. urtean Txurruka atzelariarekin batera. Remen datorren astelehenean doa berriz Hartfordeko frontoira, baina berak aitortu digunez, nekatuta dago. Egia esateko, badiu bai, nekatuta egoteko arrazoiak, ia hogeita urte bete bait ditu Estatu Batuetako frontoietan.

Remenek lesio garrantzitsua izan zuen orain dela urte batzuk bere eskuineko besoan, eta medikuen aurrikuspenak larriak izan ziren arren, aurrera egin zuen, bere laguna den Kepa Ibarra masaiariaren laguntzarekin. «Lesio handia izan nuen eskuineko besoan eta medikuek beharrezkotzat jo zuten ebakuntza. Ebakuntza egin ondoren hiru hilabete igelsoarekin egon behar nuen eta beste bi errehabilitazio ariketak egin. Hala eta guztiz ere ez zidaten ziurtatu, sendatuko nintzenik. Azkenik, enpresakoekin arazoak izan arren, ezetz esan nion ebakuntzari eta Kepa Ibarren eskuetan jarri nintzen. Sei aste pasa ondoren, frontoira itzuli nintzen», adierazi zion Juan Ramon Rementeriak EGUNKARIARI.

Munduko txapeladunak 36 urte ditu eta sasoiaren dagoela argi utzi zuen mundialean «Nik neuk ezin dut esan noiz arte jarraituko dudun. Bakoitzak ikusi behar du, bere gaitasuna norainokoa den. Ni neu ondo nago eta beste sei urte behintzat beteko ditut. Hortik aurrera ikusiko dugu», esan zuen Remenek.